

CAPUT V.

AJAS AD MARITI ELECTIONEM PROPECTUS.

1. AD terræ dominum illum, qui in sacrificio *Visvajit* appellato omnes suas divitias distribuerat, advenit KAUTSAS, VARATANTUIS discipulus, scientiam adeptus, magistri sui præmium quærens.

2. Ille, qui vasibus aureis destitutus in vase terreno sacrificium deposuerat, inæstimabili indole præditus, hospitalis, gloria illustris, obviam ivit hospiti illi, *Vedarum* cognitione splendenti.

3. Hominum dominus, præcepta noscens, primus eorum qui honore abundant, officiorum gnarus, illum castigationibus divitem rite honoravit, atque sedentem junctis manibus sic allocutus est.

4. “ O tu, cujus intellectus *kusæ* instar acutus est! num bene valet magister tuus, dux vatum consilia dantium, a quo tu scientiam integram adeptus es, ut mundus animam a sole?

5. “ Num castigatio triplex, quam magnus ille vates corpore, voce et spiritu semper exercet, ipsius INDRÆ firmitatem concutiens, ullis impedimenti interruptitur?

6. “ Num eremi arboribus, fatigationem mitigantibus, canalium ductione alioque cultu filiarum instar curari solitis, ulla calamitas a procellis vel aliud quidquam infortunium accidit?

7. “ Num incolumis est cervarum proles, cui in ipso eremitarum gremio umbilici nervus decedit, quæ ab eremitis non turbabatur, etiamsi in *kusæ* gramine, cærimoniarum caussa collecto, dulce recubisset?

8. “ Num placidæ sunt aquæ illæ consecratæ, quibus ablutio sacra peragitur, unde patribus libationes suppeditantur, atque quarum ripæ frumenti collecti sextante sunt conspicuæ?